

可也○趙邦彥啓曰儒生講書付標大文漏通事 命推承旨之先造
意者李龜齡李賢輔一時造意而漏通請并推之請曰依啓并行公推
考可也○兵曹啓曰李世孫全家入居于滿浦鎮事已為公事但聞禁
府堂上及朝廷之意世孫乃難測之人也彼地則野人往來交通貿易
之處若送此人於彼地則恐有作弊之事也請移於他處傳曰依啓○
夜南方有氣如火

三月壬申朔傳曰安從坦柳漑邊明胤事非如九人公事斯速奏覆○
下儒生殿講單字曰此通講四人於鄉漢城試中給二分可也○癸酉
禁府啓曰婦人以妬忌被罪前例考之則申壽麟妻阿只亦以妬忌之
罪單衣決杖一百矣但申壽麟妻則酷刑殺害而河億水妻則以金刃
殺害其事不同故不付前例矣且今日末貞奴子呈所志云上典李氏
時方孕胎今若失罰則恐或隕命即今醫女診脉孕胎今果八朔矣傳
曰酷刑殺害金刃殺害其罪無異禁府不付前例至為誤矣末貞亦當
單衣決罰矣但孕胎八朔云今不可決杖亦不可以囚也婦人萬無
逃躲之理其令保放而待解產滿百日後決杖可也且末貞以妬忌用金
刃殺其婢此於名教有關之事而其夫進士河億水固非無識者之比